

四庫全書

集部

欽定四庫全書

相山集卷十二

宋 王之道 撰

七言律詩

邊公式周表卿侍郎同年會

侍郎邊公式周表卿以紹興十七年夏四月癸丑
講甲辰同升之好與諸公把酒湖上為汎舟之集
預會者余宅仲李景圭王端才何才卿蔡仲平時
昌臣李宜仲王彥光及之道共一十一人坐中公

式令之道賦詩為唱得東字韻修故事也之道奉
命不敢以固陋辭強勉奉呈

侍郎修好燕羣公鴈塔題名二紀同談笑靜移楊柳日
杯盤清泛芰荷風鵬搏競祝三旌貴鯨吸相期百榼空
此會明年應更好馬周行亦起新豐

蘇臺憫農

蘇臺五月苦多雨自葑門以東積潦浮天下田所
不沉者數寸堤耳農夫以無土沒水取泥培隄防

捍湧溢去歲既遭旱每食輒不飽今復患水良可
矜也作憫農一首

稻田高下欲分畦積潦瀰茫隔寸堤天意未收連夜雨
農功良苦半身泥一丸莫救風濤決千頃空憐稼穡低
朝滿夕除應可信望晴心緒憶昌黎

宣城驛中送建康倅趙純中

芍藥飄零雨洗春江城柳色靜無塵扁舟未果尋歸路
小驛那堪送故人萬里雲天心共遠一龕燈火話相親

因風無惜霑餘馥我亦貧兒望富隣

和文倅侯彥嘉二首

彥嘉與通判孔純老同僚之舊是行來謁知郡鄭
深道相遇於無為聯珠唱玉不日成軸僕幸周旋
其間縱觀妙句獲所未嘗而彥嘉早晚當赴官西
去敢和二詩以為異時撫掌一笑

相逢珠玉走佳章顧我無能更老蒼嘗鼎固應從指染
衝天行喜見雲翔向來別恨江同遠此去詩情日共長

才似二公今二妙山庭淵角繡肝腸

暉暉晴日樹頭平望外遙山宿霧輕積潦夜增南浦漲
微風朝送北牕清滯留羈客牽歸思陶寫新詩盡物情
誰謂春宵常苦短老來無寐厭長更

送無為守鄭深道移嚴州

世稱儒雅擅青徐今見君侯信不虛報政未容更繡水
除書先已易桐廬郡隣帝所旋趨召地切家山勿戀居
千乘來迎催去急邦人何計挽行車

送錢遜叔出守襲慶賜出身除職

賜對金鑾下九天旋聞熊軾為驅前人從芸閣初分直
桂折蟾宮乍得仙刺史江山聊復爾翰林風月自依然
下車快草東封疏今去祥符正百年

次韻蔣守張進彥

邂逅傳杯莫放杯七年重見夢初回休嗟歲月堂堂去
且喜旌麾得得來春至會霑新雨露時清應掃舊氛埃
如君才業今張鎬憐我棲遲轂屢推

送陳南仲守象州

熊軾朱轡照野明知君今赴象山行
榮觀共作歎嗟語
靜念獨傷離別情畏景逼人才數日
脩塗計此始三程
至時應在中元後好寄雙魚慰友生

送秦德久守安豐

德久與僕相別十六年今邂逅宣城
其適我願不言可知而德久方出守
安豐將取道於無為既已
涓吉戒塗不容少留僕方自無為來
未能遽歸以

追驥尾為之悵惘無窮勉效古人贈言五十六字
奉呈

歷水分攜十六年相逢鬚鬢盡蒼然喜君官況新來好
許我交情老更堅小雨送行春溜急長楊留別午陰圓
畫船插幟澄江遠回首風帆指繡川

喜雨

雷聲翻海電光紅濯濯薔薇一夜空雲氣共看淵躍蛟
雨祥曾驗葉生蟲佇期多稼千箱富先慶來甦百室豐

飾喜自慚樽酒薄只將香火向穹窿

次韻周漕喜雨

十載棲遲畝間無聊尤苦屢無年可憐一雨今時若
便覺千塍頗鬱然擊壤有期應共慶效顰非分敢爭妍
正當簷溜江河決想見高吟夜不眠

酬章序臣二首

比得江梅數枝於里人因以遺
序臣章公既報我以兩絕又有

唐律因用
韻和呈

風梢搖落雪飛花誰傳江梅到我家曾把數枝分暗馥

要催羣卉助光華高吟兩絕那容繼勝賞雙清茂以加
春不世情應委曲十年留滯在天涯

老懶觀梅喜見花一枝聊復寄君家清香撲袂傳春信
踈影搖牕借日華小小池塘從掩映依依楊柳漫交加
和羹風味今猶古回首青青遂有涯

酬李才叔見贈

與李才叔契闊凡十一年今相遇於越上大適我
願望蒙賦詩送行置酒話別所以眷予之意甚厚

謹繼韻

篙師且緩莫予催老眼逢君喜暫開相與未成招隱什
分携宜盡送行杯誰令急景堂堂去我為佳人得得來
萬壑千岩終欲遍歸歟清夢轉幽哉

酬周少隱贈行之什

我老無知獨夢魚清風一枕午鐘餘忽驚珠玉情相厚
便覺山林計不踈酒熟會看延客醉詩成還復遣兒書
何人竟得閒中趣只恐無聊歎索居

酬張進彥見寄

進彥直閣以僕昔年嘗有惡語書合肥驛中壁間
諷度之餘特辱寵和二章見寄至縛虎敢辭山路
險斬鯨終見海波澄之句不唯筆力雄健難到亦
可以想見其心也

皇華應記去年曾六轡馳驅問固陵道路向來荒枳棘
隄封從昔錯溝塍烟銷列嶂秋光遠木落長淮霽色澄
自笑壯心窮未已欲言言大怕人憎

酬呂公季

公季昔寓華嚴精舍有半面之舊重來踰三十載
殆一世矣得官漢陽未能行以無為孔倅少年庠
序之交故自湖陰拏舟至此冀其惠顧前好有以
振之而孔倅方攝龍舒郡事正官旦夕且入境公
季不欲往謁少留以遲其歸逆旅蕭條厨爨不煙
予還自西郊聞之饌以新粢用救在陳之厄公季
有詩見貽因和其韻

相逢賓戲快逢場何幸輕投得夜光半面向懷精舍舊
一行今整漢陽裝如君俊逸猶沉滯顧我迂疎合退藏
別乘未來霜候冷客燈明滅漏聲長

酬蘄春王宰公明

僕衰晚不競迫於食貧日久將有臨安之逸吾宗
公明知縣以言見贈過有褒拂嗣韻報之

致身華貴屬華年顧我鴛鴦久不前醉被長官輕罵鄭
懶從學子競嘲邊功名有日還三傑詩酒何人繼八仙

才業似君真獨步文章政事盡堪傳

和趙養正春日遊魏園

藜杖芒鞋信脚行宿雲披絮雨初晴溪邊草色青氈合
竹外山光翠蓋橫弱柳弄閒無限思小桃含笑不勝情
清明此去旬餘日花底能尋載酒盟

和孫延壽喜雨述懷韻

小雨霏霏夜接朝乍驚和氣入民謠官逋庶為麥秋緩
酒價定隨人意饒欲落棗花蠶斷繭半黃梅子稻移苗

書生不慣征徭苦牢落僧房不自聊

寄別江茂德赴麻城丞二首

此行何處有淹留
新得中郎萬斛舟
會見馬羣空冀野
還同鶴駕到揚州
鱸魚出網紅翻錦
江水浮山綠潑油
回首風檣惜輕別
一聲鴻鴈起滄洲

次韻周運判彥約芍藥

獨殿羣芳占晚春
對花猶幸有斯人
宓妃正自須曹賦
楚女何妨與宋鄰
醉著午風濃似酒
粧融朝雨細如塵

邊城正藉詩書帥俎豆於今識祭遵

次韻蔡永叔雙頭芍藥

反復新詩對月華規模猶及正而葩坐馳芍藥心先醉
身老江湖眼欲花夜半已酬連理約風前還見一枝斜
灘頭更下雙鷗鷺併與妖紅作意誇

和方正叔芍藥

院落青和晝漏長曲欄高檻倚新粧未饒玉蘂來仙女
那羨蓮花似阿郎遣興勉從吾輩在追歡難入少年場

開緘忽得驚人句滿紙雲烟翰墨香

夜聽劉昭遠彈琴

河陰高轉月光流露脚斜飛夜氣收焦尾冷含三尺水
悲風彈破一庭秋廣陵別後多新操子敬亡來絕舊遊
欲洗世間箏笛耳為言千斛不須求

和江和仲司理喜雨

朝來虹影散青紅旱氣旋隨夜雨空
頑頤競看飛石燕
螺螄應快洗挑蟲舊聞人說天心解
今見時和歲事豐

五穀穰穰無幾日敢將豚酒謝穹窿

紫薇花

過盡紅薇到紫薇廣庭高檻見芳菲
繽紛不逐槐花落拂掠應從燕子飛
枝壓畫簷朝露重影搖苔砌午風微
何當草詔絲綸閣伴我黃昏坐禁闈

春雪

一夜春寒夢寐清柳梢梅萼頗關情
山川千里玉為路樓觀半天雲滿城
徑醉已從釃酒去稍晴當辦出郊行

東君底事偏芳草剗盡依然上砌生

立春日雪和趙端質韻

春寒有信不踰期肯為衰顏獨見欺白雪已輸梅鬪早
綠樽尤與火相宜擷來野蔌和萱草分得江魚貫柳枝
刺史憂民民共樂賽牛歸去競褰帷

次韻何子應大卿喜雪武昌作

雲氣浮江不見邊擁爐吟雪思飄然風將急霰先鳴瓦
水剪寒花忽際天才澁敢陪梁苑客興來從泛剡溪船

將軍乘夜平淮蔡翻笑元和十二年

哀周然明

三薦渠能老一儒班超投筆好從吾功名到手身先死
詩禮傳家道不孤千里新封從馬鬣百年餘慶萃鵷雛
西風哀挽桐川上儻有青芻致奠無

魏道弼父挽詞代曾子修

德邵年高冠里閭慶餘猶及魏公舒似聞白鶴歸華表
應有青芻奠故廬帝夢漫驚虞澗築史占空歎渭濱漁

泣然東望無從涕莫廁邦人會奠車

次韻元發弟秋日德餘庵書事二首

飽諳世事轉踈慵投老猶能向佛宮
危坐遂移桑蔭日清談仍對菊花風
憑君為我追歡伯自此游山作醉翁
聞說秋來足佳句暮歸應念錦囊空

十載江湖歎斷蓬夢魂時到帝王宮
珠簾高捲蝦鬚日寶扇斜開雉尾宮
勿謂趙堯刀筆吏須憐竇鞶韞嚚翁
兒童來告黃花熟可喜樽中酒不空

和戴禹功水雲館留題

兵火間關我爾同相逢聊喜話忽忽山長不礙飛雲去
江漲應從遠水通白鷺晚潮初浸脚雨花遺址正橫空
臨風遐想成惆悵千古興亡一局終

和秦壽之題天祚宮

洞天無際復無旁喬木梢雲十萬章身外軒裳誰繫綰
壺中日月自舒長平生塵垢煩三沐投老功名笑五漿
白鹿青牛今在否一聲秋磬上寥陽

題浮光丘家山寺

古寺鐘鳴漏向殘
馬嘶人起束征鞍
瞳矓半弄陰晴日
栗烈初迎小大寒
溪水斷流寒凍合
野田飛燒曉霜乾
嗟予老踏浮光路
陟岵懷親眼欲酸

次韻秦壽之題四祖

古木參天翠作堆
雲中石棧為誰開
樓臺正倚雙峰起
香火曾瞻四祖來
霜重靜聞秋子落
風高愁聽曉猿哀
當年松上花何似
五葉依然映紫苔

四祖常簪花松上
松時方拱把今合

抱而簪花處皮獨不出
其深數尺花猶存焉

次韻秦壽之題五祖

栽花傳法總吾身生滅無煩取次論一夢儻從今日覺
羣峰應許此山尊塔中相好如來具手裏衣盂達磨存

若遇小兒宜借問性華何處更尋根

四祖住雙峯一日黃梅道上問小兒

姓兒曰姓有不是常姓祖曰是何姓兒曰是佛姓兒後
為五祖遂傳衣有偈云華種有生姓因地華生生大緣
與性合當
生生不生

題四祖山瀑泉亭

予紹興二十七年秋七月丁卯至山中登瀑泉亭
徧閱先賢留題佳句追和主客楊次公韻

雲影瞳矐雨弄晴山頭小立聽溪聲不驚赤日雷霆吼
但怪青天雪電鳴氣逼衣裳秋暑薄光搖林藪午風輕
法身清淨元無垢何用臨流更濯纓

贈五祖山淨老

欲知祖意路堂堂滿目湖山自放光
湧亂雲迎馬足峯迴荒磴上羊腸
心花肯逐春同老法雨何妨歲用康

試向樵夫問端的白蓮生處是吾鄉

贈古若之上人

灩潭澄碧見師心我欲窮源何處尋
萬壑松風酬夜諷
一犁花雨發春吟不妨契濶三年別
却得留連數日陰
竹外小桃開也未靈雲應已久披襟

送浮屠曇遠歸無為持鉢

一筇春色滿郊畿彈指淮南迅若飛
丈室正須香積供
孤雲聊作故山歸
長安城裏風烟好錦繡溪頭筍蕨肥

我有上林桃李約未容隨子赴親闈

宿吉祥寺贈應上人

窓前脩竹翠摩雲清閼題軒念昔人三紀重來驚隔世
一言相契定前因携尊得得紛親友扶藹纍纍萃里民
祖意如來煩指似迷舟何幸濟通津

雨中宿竹林寺謝尉仁父見訪

幽人好客不嫌紆帶水拖泥辱顧予僧舍頻驚樽有酒
旅庖那患食無魚敢辭數里來相遇要使它時付特書

新竹茂林中掃逕一甌春雪少躊躇

示隱靜恭老

游山何敢避泥塗恰值催花夜雨餘
杯渡已知無用楫馬行今信不更車
數聲幽鳥過庭際一派飛泉赴壑初
正欲尋師問心法却驚行色逼鐘魚

送懿上人持鉢潛川

坐覺青山忽上心着鞭來欲故人尋
萬松未放孤雲過一飯共聽幽鳥鳴
莫厭崎嶇窮野徑須憐峭絕春陰

潛川者舊如相問千里長同月一襟

橫枝山北別懿上人

青山終是慰人心到處相逢不用尋
顧我未能忘楚些
因君聊復效吳吟
遙林入眼增雙碧
羸馬犇家競寸陰
何事橫枝送南北
他年同此記分襟

因上人訪予相山夜聞二子誦書有詩次韻

杖錫東來意亦勤
寒巖枯木自相親
方驚妙論雨侵坐
忽喜新詩光照人
物外交遊清似水
夢中憂患碎如塵

兒童正欲承磐錯應覺臨文便有神

還通上人卷

格清詞苦與誰論携繞錢塘給事墳所得豈容人繼和
朗吟應被鶴聽聞月輪冷照千巖雪霞片輕裝萬疊雲
投向吾廬卜知己擬將詩草為師焚

次韻和朗公見贈

朗公少年曾遊荆湖
識虛中齊己

朗公垂老尚吟詩曾泛三湘看九嶷欲問勞生心擾擾
強酬佳句思遲遲紅塵策馬殊無味碧杖移僧自合宜

共待中條山有雪寺樓吟望更同誰

贈省欽

師善八分太宗召于殿上書數行賜紫衣

舊隱何年別翠微
瀑泉聲外鑠禪扉
御前曾寫八分字
天上特宣三事衣
燈照夜庵霜後冷
鼎烹秋菌雨中肥
終歸五老峯邊去
杯渡長江一錫飛

和因上人三首

當塗瑞像因上人有詩欲獻之
郡將出以示予予報之三章其一
嘉浮屠之能為吾儒之學而欲誘

之使至於道也其二寫寂寞幽鬱之思於偕來何
子以相慰釋也其三有懷吾親將歸耕相山為終
焉之計也知我者幸不我謂非敢言詩也

一枰蘭若復誰家坐見羲和下日車燥吻未濡蓮社酒
枯腸空攪玉川茶搖風綠竹初翻籜過雨紅葵甚放花
得句至今頻示我安能鬱鬱久茲耶

歸騎何時遂到家蒼頭獵獵走風車醜妻終勝長為客
薄酒能無更飲茶夢斷北窓涼似水望中南畝雨飛花

采蓮遊女應相識早晚扁舟訪若耶

白雲飛處是吾家石眼泠泠水一車
醉日到來應種竹梅時過盡好藏茶
遙憐壺棗初成實似說占未半吐花
已得伽陀微妙句歸歟香火諷囉耶

贈朗上人

朗公少遊渚宮
與齋已相識

淨剃霜髭展舊真自疑容貌是前身
僧中獨守三千戒詩裏閒銷七十春
僻寺鮮深人到少故山雲好夢歸頻
禪齋近日誰還往祇有西垣放逐臣

贈贊寧大師

詔修僧史浙江濱萬卷書中老一身赴闕尚留支遁馬
援毫應待仲尼麟溟濛雪影松窓曉狼籍苔花竹院春
還許幽齋暫相訪却慙陶令滿衣塵

朗上人見訪復謁不遇留刺而還有詩見謝依
韻和答

湯休訪我我重尋獨叩松闕絕好音滿袖塵埃回俗步
一鑪香火隔禪林偶留刺字情非淺忽枉詩章思更深

猶喜謫官無吏役往來從此伴閒吟

贈遇公上人

卧雲衣服半爛斑吳越烟蘿舊往還幾度看濤羅剎石
經年尋藥武夷山剃髭刃澁秋窓冷補衲燈微夜榻閒
應笑勞生苦多事槐花時節入秦關

寄贊寧上人

時上人進新修高僧傳有詔赴闕

支公兼有董狐才史傳修成乙夜開天子遠酬丹詔去
高僧不出白雲來眉毫久別應垂雪心印休傳本似灰

若念重瞳欲相見未妨西上一浮杯

和天寧因上人次韻

日月漂流一鳥過別來心迹病維摩是非孰辨聊分謗
誕信相譏要止訛搖落獨憐松不改澄清嘗見海無波
句中有眼勞開警更問諸人會得麼

和褒山因老二首

湖上逢師又到家別來詩句好相誇休嗟晚菊今迷草
且喜寒梅欲放花丈室香溫巖寶坐將壇風軟擁高牙

相思對雪酬珠玉不覺茅簷送月華

島可文章似出家不將言語落浮誇雪中令我思風絮
天上因君合雨花一炷飛烟雲天矯數行佳樹玉槎牙
山高殊覺青霄近捫虱南窓向日華

次韻因上人謝徐守遺顧渚茶

相從聊罷致書郵情寄詩筒早晚休顧我未忘童子好
評君還向古人求緇奩啟處雲英馥石鼎煎來雪浪浮
多謝徐卿分顧渚報之瓊玖兩相收

五言長律

送趙端質歸朝

聖治中興日宗藩第一流九重資共理三載賴分憂
昨日交符虎當時競帶牛咄嗟成藥石談笑獲鋤耰
善政稱無擾罷民遂有瘳教風興子弟膏澤被田疇
士論高強漢王功繼屏周外臺書課最禁從表才猷
往矣登青瑣宜哉建碧油瘡痍爭借寇憔悴獨依劉
我願攀鱗進人思卧轍留是行端可喜名姓在金甌

過富池題澄江閣二首

晚日千峯色，秋風萬里情。
望雲雙目眩，渴雨寸心傾。
有客詩方就，何人笛正橫。
渚烟縈別浦，江月動前楹。
草木腥猶在，生靈痛未平。
傷哉一杯酒，北向酹遑城。

江山南北限風月，古今情舉酒杯還。
覆逢人蓋暫傾目，窮飛鳥落心逐斷雲橫。
小市支殘屋，嚴祠列畫楹。
晚烟漁艇遠，夏潦荻洲平。
試問濡須路，歸與過幾城。

次韻劉春卿書懷

老去宜安分年來強競辰功名雖自許心腹欲誰陳
賴有金谿彥相從錦水濱詞華三鳳蔚詩律八音純
風月論交舊雲山發興新鄙懷煩澡雪高義歎傾圉
李嶠真才子唐邕實異人感時悲鶴戰憂國賦車麟
寤寐思摧敵行藏冀澤民
廉高辭鄭粟狂笑取韓銀
松柏迷荆棘琳琅雜珉珉
北游觀赤幘西走避黃巾
端木謀存魯長沙論過秦
江湖雙醉眼天地一間身
遵海嗟黃屋垂衣想紫宸
擒王須李靖抗賊付張巡
尚緩三城役方馳六

轡詢兩河蜂伴蟻多壘介和鱗烽火青淮隔樓船古汴
堙離宮埋茂草禁蘄掩荒榛典冊尊諸夏戎羌守四鄰
如何來醜類容易破重闈大厦煙焚突長堤蟻潰湣複
垣閭闔夜層觀景龍春茂視排姦魏空聞識反甄傷哉
無止鼠甚矣不由鷄天啟中興運時當外侮賓此生那
習坎吾道已康屯黃卷何妨對青燈正可親侏儒歸隲
括苦窳入陶鈞夸父勞追日顏回悵絕塵廟堂資贊輔
巖穴忍跼蹐炳煥文中虎玲瓏席上珍肯終虞澗築聊

滯越山薪君壯勤非勉予哀懶是真會看鳴鷺鷺相慶
畫麒麟簪紱行當貴養鹽莫厭貧仲尼憂悄悄揚子惡
頻頻守節身何屈移忠道自伸秋吟足佳句飛動筆如神

追和韓退之雪韻

一時符衆望七尺驄童謠人喜豐穰兆吾知瘴癘銷
看還撲面閒試欲齊腰墮絮紛辭萼飛花半惹條松篁
低到地溪澗合平橋月牖潛爭入風簾靜自搖紅金延
坐夜綠蟻送行朝暗上歌茵隰輕隨舞袖飄千林翻魯

縞萬里藉鮫綃燈市堪行樂何妨酒價饒

菊有黃花為彥逢弟壽

正色憎桃李凌霜見嫩黃有同高士操常占晚秋芳
裊金風軟溥溥玉露光君恩隆一束時令應重陽幸遇
桑蓬慶欣逢麴米香敢因難老祝採掇奉瑤觴

春雪和袁望回三首

殘歲連人日同雲暗海涯晨開才曠晃暮集復交加
野色鋪霜縞秋光散玉葩老夫僵不掃稚子走爭拿皎潔

欺梅萼嚴凝禁草芽
餓彪迷舊穴驚鴈失圓沙
有客方誇酒何人欲鬪茶
南山歌禹甸西國想毗耶
弄日烏薪熟園風翠幙遮
豈知春霽好萬物動芳華

誰謂過殘臘餘寒遂有涯
雪來風益橫冰着雨還加萬
里隋堤絮千山庾嶺葩
素門晨尚閉剡艇夜應拿
百蟄猶含土羣芳敢放芽
嬌紅還玉茗新綠借金沙
力勝榴花酒功高雀舌茶
人心愁甚矣天意欲何耶
好放朝陽出休從宿霧遮
青腰誠念我明日變霜華

稜稜威正肅浩浩意無涯雨息風還怒霜餘雪更加
穠還席地蒼蘆競分葩虎飢豺狼搏烏窮鳥雀拿木冰
鳴玉佩簷溜軋蘆芽鶴集疑驚露羊羣憶卧沙晚餐甘
當肉外酒薄勝茶盈尺其多矣踰旬果是耶日車行自
駕雲障欲何遮坐想傳柑飲千官從翠華

和素望回春雪

白雪嫌春晚縱橫布玉霙柳花隨處發瑤砌逐門成
旌別寒松茂摧殘凍茅萌飄颻無限思料峭有餘清舞袂

朝猶濕吟窻夜自明色疑侵兩鬢光欲眩雙睛曠晃千
林曉潺湲萬壑晴江梅含故態山鳥弄新聲雅與詩情
慙應憐病骨輕澆腸一杯酒風力鬪崢嶸

對雪和子達用歐陽子韻

散漫來天際高吟正倚門遠山雲母合芳樹柳花繁匝
地銀無價冰湖鑑有痕何人穿敝履有客擁高軒訪戴
從東棹游梁快北轅鼎寒香屢撥杯冷酒重溫風力千
林吼雲容萬騎屯食餘鹽虎卧坐久炭猊蹲觀舞更三

疊論文罄一樽清芬難拚覆端的屬梅園

送楊德潤赴禮部試

雨意止還作天容寒未舒無聊懷劇論何幸過窮居舉
白夜釀酒剪黃朝薦蔬新詩閒鼓吹舊隱亂丘墟軒冕
時何晚山林計亦疎中興屈羣策入告莫躊躇

追和東坡立春韻寄彥逢弟

荏苒歲云暮艱難予豈堪闕山懷遠別弓矢廢清談風
色霽還暖梅梢春已酣信音驚遠鴈心緒亂游蠶投筆

班超近擒戎李靖慙行吟望西北赴難有虞潭

六言詩

和徐季功墨梅

閒想窺池倒影戲成落筆斜枝縱涅難溜玉質細看何
似當時

便是朱唇素面那知綠葉青枝淨几明窻展處微風淡
月醒時

五言絕句

題成國仲畫扇

奮髯欲何為，戢翼應有待。畫工妙丹青，物狀從變態。

題馬以道畫扇

寒蘆卧踈黃，遠水分淡碧。秋荷如有情，相映兩鸕鷀。

追和魯直蠟梅二首

一種幽素姿，凌寒為誰展。似嫌冰雪清，故作黃金淺。
歲窮壓霜雪，春至喜風露。一枝蠟梅花，清香美無度。

送道者史寶通作丐

昔日山前寺兵餘掃地空汝今能協力真是寶林通

又送道者王法圓作丐

誓將三寸舌求結萬人緣寶刹成功日當期道法圓

送浮屠道廓

一宿已先覺四明那更遊去來無所着風日海山秋



欽定四庫全書

集部

相山集卷十三至

詳校官左中允_臣瑋五珠

主事_臣呂雲棟覆勘

謄錄監生_臣朱起鳳

謄錄監生_臣陳遂

欽定四庫全書

相山集卷十三

宋 王之道 撰

七言絕句

送賈教授偉滿罷東歸

赤城賈之奇頃聞馳聲賢闕遠追其先洛陽年少
予願見之久矣是行分教武陵予偶將命本路遂
獲相從於此首尾三年而見輩因得朝夕承教可
謂幸矣今報政還朝予亦早晚當罷去語離江濱

令人悵然因成二十八字奉送行色隆興改元冬
十月戊辰

妙年才氣擅超羣試吏來司泮水片行奚玉堂應召直
忍將風袂與君分

重陽示二三友

龍山何處暮雲黃坐想前賢落帽狂萸實菊花良不惡
為君沽酒作重陽

秋日憫旱題香山莊舍

千里驕陽稼穡枯人心窮極但天呼須煩巖壑為霖手
下澤蒼生慰海隅

寄梅花與曾子修

待船聊復駐征驂手撚梅花望翠嵐花似若人清絕俗
故從江北寄江南

送曾式古歸建昌

兩年說歸明日歸江頭草軟花芬菲風調江淨船行駛
好看芳草懷春暉

酬孔純老送海錯三首

海錯東來自四明感君憐我故分珍拜嘉何必須豪飲
大嚼姑從得句新

螺頭已荷蕪三和鳳髓何須貴八珍多謝邦君憐不飲
只將詩句巧爭新

惡語豈堪酬妙句麤餐曾不饜常珍得君海錯俱奇絕
從此鄞江發興新

和子厚弟春日見寄三首

睡起晴牕正憶渠老兵聲啅到前除
新詩價重連城壁
便覺貧家富不虛

一鞭春色去迢迢溪上紅粧笑語嬌
酒醉不知行客避
競眠芳草鬪裙腰

十里西疇馬送曛晚風依約度溪雲
懸知今夜桃花雨
一洗焦枯慰使君

謝潘壽卿惠牋并詩

餉厚東陽一萬番從今難放筆頭閒
新詩正與花牋似

文彩縱橫咳唾間

道上雜花盛開

涓涓流水雨晴初
夾道山花簇綵輿
千騎不辭迎候遠
物情春意竟何如

風雨損花

雨多南國惜春歸
多謝詩人賦采菲
墮白殘紅無處著
漫隨風絮作團飛

落梅入硯池

玉佩翻然下帝傍
墨池照影妬新粧
時人莫作飄零看
收拾毫端無盡香

玉樹花

幾年埋沒亂荆榛
軒檻移來特地新
何事臨風忍相對
傷心一曲舊亡陳

芭蕉

秋風鳴玉雨踈踈
嫩綠臨牕半卷舒
似是相知慰牢落
朝來肯寄一緘書

菊

千林搖落見孤芳
色映青松破嫩黃
玉露淒涼三逕晚
金英芬馥幾叢香

山茶

開花不與衆芳期
先得江梅破白時
犀甲鶴頭微帶雪
畫屏曾見兩三枝

荷花

亭亭青蓋倚宮粧
新浴溫泉體自香
暫借青風來一霎

欲披雲錦見蜂房

紅梅

穠華不與衆芳同
偏愛施朱立曉風
莫道春來無酒病
臉霞猶帶夜來紅

題烏江官舍木芙蓉

挑葉蕭疎柳葉黃
清寒應怯夜來霜
芙蓉雅與秋相好
獨對層臺試曉粧

青梅

踈白欺人侵短鬢老紅乘酒駐衰顏食梅已判非吾事
把讀清詩憶故山

和魏定父早春十首

早從子美追懶真近向長康得癡絕相逢可笑復可憐
君看稀踈鬢邊雪

安得都護胡青驄與君並轡搖玲瓏南溪今日凍初解
好看游魚翻鬣紅

依依楊柳繞溪斜黑白溪頭鵲伴鴉雨過蕪菁自春色

一叢茅屋野人家

晚來天意欲晴寒
幽鳥爭春到舌端
詩骨自憐山樣瘦
酒腸君似海能寬

門前溪水綠縈迴
風穀無邊費剪裁
待與東君寫春色
好教紅紫一時開

春到花梢一點紅
吹噓應謝曉來風
南園繚繞城邊路
無限詩情杖履中

灑灑溪流碎玉鳴
野梅隨處伴行人
歸歟路出臨邛市

準擬沉浮麴米春

怪來庭砌墮寒梅
風笛數聲清以哀
兩日枯腸饜蔬筍
不堪茗椀發輕雷

辰瓜醉竹定何如
試問君家種蒔書
坐久幽牕轉斜日
恰憐梅影上衣裾

南禪相望無多地
深謝高軒日見過
歸去山林遂閒放
却尋農圃問誰何

和秦壽之春晚偶成八絕

相從輒莫太忽忽賭酒分茶自有功誰謂春歸無處覓
柳蹊飛絮亂因風

照眼酴醾正及時
紅相映似相知
天公應也憐芳意
一霎輕風宿霧披

花外霏微雨
弄晴亂紅狼藉過
清明傷春正苦無聊甚
接接欣聞噪鵲聲

官閒時醉秀溪春
醉裏吟詩字字新
欲報自慚無好語
年來胸次亦埃塵

欲下荒庭意已闌一枝紅藥坐中看東風不息成何事
又醞春陰作夜寒

輕陰還傍麥秋天病怯春寒獨衣綿老境不知行樂好
坐來芳樹看鶯遷

春來談笑數追陪多謝傳杯不放杯醉裏狂言應可笑
問春歸去幾時回

帶雨飛來燕一雙問伊何事為春忙野人不解呢喃意
勉強搜吟對麥光

和王園中道上初見梅花二首

馬頭驚見一枝新
夾道歡呼擁吏民
咫尺招提鷄黍約
不妨同醉萬家春

安養瘡痍過所親
野人何幸預斯民
自憐枯槁無生意
遂與寒梅競得春

和沈次韓春日郊行二首

楊花落地鷓鴣飛
百里湖山碧四圍
信步不知行幾遠
却憐芳草伴人歸

山色新晴一蘸青
隔溪無數野花明
杞苗荻筍肥應美
採掇何妨趁晚烹

和張文伯春日勸農

奉詔歡均草莽臣
郊原風日自溫溫
欲知太守催耕意
重穀劬農本聖恩

和劉春卿秋夜對月

天宇澄清桂影秋
騷人乘興欲登樓
樓前白水三千頃
混混鎔銀爛不收

和章序臣梅花二首

之道此因諸公以職事多出無復有以詩相牽帥
者筆硯遂埃沒今日偶得早梅數枝不敢獨有漫
送序臣迺辱妙句輒嗣元韻奉謝

三月詩筒絕往來有時談麈許追陪梅花雅欲撩佳句
犯雪凌霜為我開

多謝蒼頭語我來恍如相見笑相陪新詩高妙梅清絕
展讀花前病眼開

和孔純老江上避風題酒肆

對酒應從暮吹號酒行還喜薦溪毛
若將物象評詩思須向江頭看怒濤

和張文伯黃悅之席上賦雪

功成三白到春迴好放雲天萬里開
今夜子猷方對客却煩安道過溪來

和張文伯先梅後雪

六花無怪索詩催正恐清寒勒早梅
待得江頭千樹暗

故爭明潔逐風來

和子厚弟冬至即事

天容如鑑地無塵
陽氣依稀動紫荊
日晷漸長端可愛
霜華增重不勝清

和王覺民雙泉道中

白雲深處是吾家
山市歸來日影斜
獨立前村聊送目
孤村流水鬧寒鴉

和魯如晦七夕

乞巧誰家綺席開
夜闌簫鼓趁虛催
啟明不為牽牛計
又放朝陽送曙來

和陳天予經過南巢邑人迎舊尹

君來井邑笑烘烘
君去蕭條迥不同
似說攀轅如昨日
可憐身老長兒童

和孔純老別鄰居錢進之醉寢留題

不敢撻節問起居
慮煩魚膾破兵厨
杜門終日無人顧
新竹牆頭出萬夫

和張文伯洞庭柑

金苞照俎出雙柑
想見和枝映筍籃
欲倩玉纖分玉液
要濡燥吻發清談

和劉春卿曉起讀書

夢斷幽禽恰轉更
窺窓殘月淡孤燈
孜孜讀誦如吾子
指日菁莪看錫朋

偶書

萬事秋來只信緣
為誰清嚏晚風前
斷虹收盡庶纖雨

喜見江南八月天

和呂子梅題陳倅牕前新栽竹二首

封殖要當同種玉
翱翔端復見停鸞
此君不是塵中物
宜減樊川十萬竿

自是清陰能借潤
不應積雨尚流寒
先生端的磻溪裔
乞與滄溟作釣竿

和陳勉仲贈淮西漕吳介之二首

威嚴霜肅德春陽
民感澄清涕泗滂
畏壘大穰知不晚

三年端可笑庚桑

九郡瘡痍賴拊存年來和氣浹江村此恩未易論天報
請看于公大里門

和趙積中白蓮三首

翠蓋亭亭水滿塘六銖新製帶天香晚來扶洗嬌無力
盡鬪冰肌不鬪粧

清風習習晚香微坐使詩人賦采菲想見溫泉初濯玉
侍兒嬌擁太真妃

耻同流輩美胭脂一樣新裁雪白衣何日與君携酒去
兩般分取載將歸

和張元禮水仙花二首

素頰黃心破曉寒葉如謾草臭如蘭一樽坐對東風軟
敢比江梅取次看

沉水香濃畫不煙賦花誰是飲中仙顧予老拙辭源澁
空想東坡萬斛泉

和秦壽之銅陵江上二首

楓葉霜餘霞燦爛葦花風起雪縱橫
銅陵江上秋容好
兩絕新詩取次成

烟銷遠水分帆影木落疎林出斧痕
嘯詠不知紅日下
九華何處望中昏

和子厚弟九日登魏文振亭園七首

瀟灑湖東小小亭一時酬唱有三明
亭前澄練無邊際
應助詩人寫物情

亂插黃花趣節宜年華休向鏡中悲
已知和氣回春谷

橫管臨風更一吹

一龕燈火夜淒清
壁下秋蟲斷續聲
細把新詩等風味
易牙元不亂溜澠

疎懶常嫌束帶勞
年來見客強垂條
不知此病容醫否
漉漉真珠出小槽

雨餘東北望銀屏
一帶寒山映骨清
誰道西風能換物
染紅楓樹亦多情

宿雨飛花阻擷芳
寄題端欲為增光
何時登攬快晴日

淪茗揮毫看瑞香

官道千秋坐小車
仙隨阮肇飯胡麻
男兒正患無津耳
千古留侯事可嘉

時雨二絕和趙積中韻

稻花時候一犁雨
天意從人無間然
我亦摧頽窮甚矣
煩君試考小行年

白江州熟人炊玉競
說前年斗萬錢
何事農夫太庸鄙
欲將豚酒謝蒼天

綠萼梅

天然膩玉細生香
斜倚東風靜淡粧
可是春寒猶料峭
曉窻猶試綠羅裳

榴花

看花令我憶金明
五月尊疊竹葉青
窈窕寶津樓下路
斷腸千里四周星

送顧渚茶與孔純老

曉來飛雪似欺春
盡把羣芳點綴勻
莫訝兩旗分顧渚

要令佳句鬪清新

欽定四庫全書

相山集卷十四

宋 王之道 撰

七言絕句

追和東坡梅花十絕

春到梅梢日自和
動人芳氣不須多
清肌瘦骨如冰玉
瘴霧那能柰子何

盈盈終日對粧臺
一樹臨溪欲半開
吟賞不須期爛漫
恐隨春雨點蒼苔

一池春水綠縈迴池上梅花暖自開想見溫泉初出浴
六宮遙指太真來

問言何處是前村萬木號寒雪障昏安得夢為蝴蝶去
花間栩栩適吟魂

真香暗逐微風遠疎影低隨淡日斜好在黃昏清淺意
一時收拾付詩家

醉眼昏昏午倦開不堪詩債苦相催清香自是蠲煩藥
為折霜蕤一朵來

莫怪風前玉笋飛
飲酣初喜傳花枝
正當北雪消殘後
恰直東風料峭時

絳跗檀口映冰肌
踏雪來看帶雪枝
一見遂能消鄙吝
汝南誰敢忽牛醫

步入芳叢脚自輕
看來羣卉眼偏明
和羹有實休疑晚
況是東君舊着情

山下溪頭賣酒家
為誰低入屋簷斜
蔬腸不柰村醪澁
笑挽長條沃井花

梅花十絕追和張文潛韻

額黃肌粉鬪新粧
春入園林度暗香
留滯江南歸未得
一枝聊復沃愁腸

曉來飛雪綴林端
冰玉肌膚巧耐寒
折得一枝紅半吐
自接香蘂當朝飧

年年常是犯凝寒
換骨曾憑九轉丹
結實和羹知不晚
試嘗花蘂味應酸

竹外山前見嫩黃
水沉清漬雪肌香
應嫌桃李風姿俗

故作尋常淡淡粧

簷花厭浥細如塵渡口舟橫不見人獨喜霜蕤清照坐
旅懷雖惡未孤春

凌霜冒雪報花期大小羣芳例是免屈指春風無十日
東君元是舊相知

素艷忽從江上見清香還向雪中聞誰能送酒來相勞
為爾開嘗對馬軍

冬溫開遍向東枝映日含風萬玉姬何必霓裳掩前古

清癯端不羨豐肥

別後開園日就荒對花還憶少年狂
東榮幾樹應無恙
待得予歸破嫩黃

花前傾步濺狂瀾
花外扶疎竹數竿
帶雪精神清更好
冰肌元慣朔風寒

梅花和黃覺民四首

淨几閒牕小小鉗
一枝春色為誰清
吾今老去心如水
銷得詩人與證明

蕭然清映水邊枝似向溫泉見玉肌被惱詩人應不徹
怪來言語總成詩

依倚春風雨淨鉶暮林搖落避真清暗香似與常娥約
來借黃昏淡淡明

夜來春信到南枝姑射神人逞雪肌多謝長鬚解予意
送將羈客換新詩

和王元渤留題松壽巖白雲庵寄鄭顧道二首

流水泠泠浸稻田巖耕應費買山錢風稍雨蓋摩霄漢

箇裏高人即地僊

日影瞳矓霽曉零幾聲幽鳥隔窓聞謝安盍為蒼生起
休戀青山卧白雲

追和賈明叔侯陟明二侍郎瑞香二首

睡香始生廬山中世未有識者一日有高人方白
晝睡恍然若聞異香忽神思清發覺而尋之得此
花於蒼崖翠壁之上故因以命名今乃以為瑞香
非也雖然無害香譜中未有以瑞名者而此香獨

得之花譜中未有以香名者而此花獨得之吾知
子弟蕙蘭僕奴龍麝綽綽有餘裕也因追和無為
先生韻庶幾當世知音者為我擊節

日午高人睡正濃幽香初破碧山紅忽然夢覺尋無處
會有東來一陣風

深院重簾數尺墻對花何必竟燒香九齡風度高難挹
舉世紛紛漫笏囊

和富公權宗丞十首

門外傳來一軸詩爛然蓬華頓增輝匹夫不敢貪懷璧
什襲今從故府歸

展讀新詩次第看管中文豹喜窺斑不知筆力能豪放
落紙雲烟欬唾間

閒想當年嘯詠聲一時人物鬪崢嶸江山清壯今猶昔
誰謂丹青畫不成

後來摸楷復何人千載風流郭泰巾欲睹詩豪兼草聖
一尊聊發洞庭春

行草應曾閱鬪蛇世情無識笑東家君看橫雨隨風勢
紙紙清新字字斜

昂昂野鶴在鷄羣一見人分濁與清吟對紅葵朝雨細
坐臨綠竹午風輕

舍北湖山千疊翠街南溪水一篙深黃鸝也似快晴日
楊柳陰中訴好音

惡客未嘗知酒聖高人何止擅文豪三司自揣非吾事
敢覲徐州解佩刀

嗟予少也慙無奇才力而今老更衰文陣異時逢大敵
猶能斬將復搴旗

我慚思澁同司馬君惠才多繼士衡今日相從非偶耳
挂冠淮浙好尋盟

觀梅和陳天子韻

斷橋踈竹帶山幽裝點詩人覓句愁多謝雙魚傳尺素
絕勝斗酒得涼州

春風草木初萌動夜雨池塘正拍浮玉骨擅心清更好

對花何惜醉扶頭

和歷陽守張仲智觀梅五首

一霎輕風過雨稀
滿庭春色碎珠璣
使君載酒花前醉
更有新詩為發揮

萬事當從酒到休
子山那得許多愁
綠樽翠杓梅花夕
不醉翻令惡客羞

誰似樊侯哲且明
解將勲業佐中興
自憐汨沒毛錐子
空對東風詠使能

夜燒紅燭照梅花
刺史風流自一家
待得殘英上丹臉
韶華端復到山茶

出車何日勞師還
二聖歸來喜見顏
乞得此身終芟製
亂山茅屋兩三間

和徐季功舒蘄道中二十首

春陰連日竟何如
逐婦應憐拙勃姑
習習晚風來更急
欲吹時雨助虛枯

一聲何處叫提壺
楊柳陰中駐犢車
笑語誰家驂兒女

浣沙溪上數遊魚

溪流灩灩草淒淒春日農郊麥穗齊捲地東風還作惡
片雲隨馬渡溪低

拍溪春水鴨頭青溪上哦詩醉眼醒不見梅花寒蘂影
野桃山杏自娉婷

三日春霖發土毛道傍芳草半人高馬頭問是棠梨市
一片梨花映小桃

野鳥闐闐督駕犁及時新雨土膏肥知君有意農夫勸

故故穿林傍馬飛

草滿池塘水滿川
雨餘溪溜正濺濺
黃梅恰在山多處
披霧時看一握天

山下溪邊阿母家
春雷初過茗生芽
馬頭睡思濃無那
一椀何妨泛乳花

一夜西風作曉晴
紛然花草鬪欣榮
蒼松巧與夭桃並
漫使詩人意不平

春雲漠漠雨纖纖
花柳叢邊見酒帘
心為惜春無處著

可堪啼鳥更般添

曉光晴影正瞳眈
轉眼還驚日過中
芳草岸頭人渡水
洛陽影裏鳥呼風

草色青青入燒痕
登臨何處暗銷魂
應憐野老無拘縛
種竹栽花教子孫

欲識吾君聖與仁
澤流寰海衆熙春
雨淮飢饉方移粟
六轡馳驅不憚勤

日遲風細午陰微
柳外青驄去若飛
過得水村聞笑語

幾家扶得醉人歸

庭閒人靜鳥窺簾坐對文書亦倦拈春旱正須三尺雨
江湖寧放老蛟潛

帶雨醺醺不自持短垣高榭倚斜枝野人莫覓丹青手
摹寫春容一絕詩

下馬郵亭忽喟然數間茅屋起孤煙山花狼籍餘無幾
斷送歸心起杜鵑

怪石形模老牯同漫將名字責農功得來正與齊田類

誰敢言耕望歲豐

瀟晚歸來麥已秋
相從時說白雲游
八年不踐同安境
夢裏山溪記舊由

光風習習日暉暉
墮絮飛紅積漸稀
芍藥酴醿看正好
一尊能共送春歸

和陳勉仲大寧院見寄

使驛馳驅賦陟岡
等閒詩戲況逢場
清和在序芳菲歇
草色連天水滿塘

和徐伯遠無為道中

江南五月稻抽芒想見含花帶露香
底事淮鄉太遲晚
一犁新雨正開荒

和徐伯遠見寄三首

我家湖上面九華無錢買山山見賒
待栽北牖一坡竹
追配東門千載瓜

新炊香軟挑花紅
蘄州竹簟初出筒
老翁易飽更甘寢
便便一覺南牕風

三詩自可當尺書得書何必須雙魚黃花強把酬雪白
丐君捧腹聊軒渠

和陳勉仲四首

清風為我曉開闌風外浮雲過雨還湛湛可憐清上下
一篙溪水水邊山

何日清游繼大蘇扁舟東去泛西湖欲將景物和詩句
寫作錢塘偉觀圖

拍天湖水注東闌水外漁舟破浪還誰似老僧閒有味

清風一榻面佳山

雨過山前草木蘇
開窗澄碧渺金湖
近來翰墨君為絕
喜見詩中有畫圖

和孔純老按屬邑六首

野雲和雨渡金湖
山色微風恍有無
不慣扁舟浮浩渺
且驅羸馬上崎嶇

雲濤雪浪渺無邊
一簇溪橋客聚船
輿衛欲休紅日下
幾家茅舍起炊烟

行並焦湖試問塗何如震澤占姑蘇提壺聒聒勸誰飲
我不知君渠自呼

客裏宵寒夢易醒起看殘月照窓明招提正在山多處
過雨流泉碎玉鳴

石竇泠泠注竹谿谿光浮動軟琉璃幽人愛玩不忍去
覓句坐驚紅日西

榛莽無邊沒盡頭當年禾稼壓田疇流亡復業知何日
九叙宜先戒用休

和戴禹功幕府歸來三首

抖擻空腸一字無下邳能復異時書中興正欲平驕寇
莫若相如賦子虛

客裏詩成付漫書清風一榻黑甜餘相山舊隱今分定
却是歸來計不踈

臨淮終日鑑修眉水外遙山尺五低我欲騎雲叫閭闔
請將捕寇付平西

和由字韻

當年相望見無由，千里荆襄隔數州。
時得新詩夸好句，

服膺何止釣槎頭。

僕頃在湖北
聞巨源詩名

和趙積中

日下高城月入扉，蒲葵不動晚風微。
幽人信步如相過，買酒黃公一醉歸。

秋日即事二首

潮退菰蒲風自倒，秋深菱芡雨應添。
怪來病眼雙明甚，喜見遙山寸碧纖。

枕綠睡熟來魂夢衣為酣頻帶酒痕多事長紅蕸短白
雨餘相倚映江村

秋日野步和王覺民十六首

芡觜靜絨秋水碧梨腮深抹夕陽紅近來詩社爭相勝
幽討冥搜字字工

桑林閒覺踈黃減菜隴貧憐嫩綠添秋水接潮還潏潏
晚風吹雨乍蕪纖

窮愁長怕詩撩撥幽憤須憑酒破除對酒更遭詩債窘

可堪毛穎不中書

揉藍拍岸秋濤信列炬緣山夜燒痕楓葉經霜紅更好
晚來扶杖過前村

荷葉倚風搖敗綠蓼花霑雨卧衰紅物華雖逐窮秋老
詩句翻從壯歲工

迂愚長與懶相兼歲晚空餘白髮添坐送夕陽還黯黯
倚看新月露纖纖

五窮韓愈煩驅逐一室陳蕃倦掃除我有墳荒舊詩集

當令阿買為君書

雨晴庭戶生秋意
潮落溪橋見水痕
稻熟人家得相向
兵餘眼底兩三村

酒嫩細斟浮蟻綠
炎柔輕剝汗衫紅
搜羅物象嗟予拙
揮掃詞章放子工

孤燈閃閃風還暗
清漏沉沉夜向添
案上數枝漙露菊
可憐踈落嫩纖纖

簞瓢不失生涯在
詩酒何當習氣除
欲倩雕弧落新鴈

足間尋覓子卿書

雨開繁菊金無價風皺平池鑑有痕日暮客帆何處落
柿林西畔荻花村

烟裏山光陳水墨雲邊日影亂青紅新詩有畫人難到
高壓澄江五字工

更窮詩債應難欠縱懶書淫亦自添水外修眉橫翠巘
試憑張敞畫濃纖

人言會飲辰嫌酉我為求醫日問除老去誰能遵百忌

秋來只欲上三書

病怯酒杯微過量
瘦憐衣帶頗寬
痕傷心故國迷煙草
秋日荒涼處處村

和卞養直見示三絕簡聖書

看君落筆走雲烟
想見新豐醉少年
龍脊舊堆騏驥種
義方今服乃翁賢

楊柳陰中乳燕飛
馬頭寒峭怯單衣
胡麻知有誰人種
應怪東遊未即歸

遲日輕風過雨天笑聲何處送鞦韆清明已逼長安近
寄語先生快着鞭

朝晴

朝來霽色快行人嫩綠妖紅照眼明去去諒無留滯歎
不妨寒食半陰晴

晚晴

飛霰飄飄墮晚風亂山無數暮雲同天工却似憐羈旅
又變霜華見碧空

一舍麻城指顧中
遠山橫翠慰吾悰
勞生艱險今嘗遍
休把狂言嚇老翁

北去安豐

問言何處是安豐
人指湖光柳影東
欲識淮西真使者
一鞭追驥有詩翁

安豐道中

水滿陂塘草滿川
望中茅屋起孤烟
十年不踏安豐路
遂與清淮作次邊

給散告帖

曾隨驍將遠追犇勇冠諸軍繼虎賁聖主念功知有自
一時高下拜新恩

早發索臯

春秋遺跡舊山川魯破吳亡久寂然恰到前年征戰處
數間茅屋起炊煙

集英殿賜第出馬上口占

鞭絲曳雪繚官槐綠陣中間一道開高下未勞輕喜愠

相公曾作榜梢來

合寨陪諸公觀月

一樽相對夜厭厭
風捲浮雲見玉蟾
凌亂請看矛作舞
清光炯炯已窺簷

永豐道上阻水

路窮得水欲何為
立馬逢人問所之
十里歸來同小楫
一鞭南去不踰時

獨步

雨晴烟渚白鷗亂風過霜林紅葉稀獨步幽吟心正苦
却憐明月照人歸

岳陽樓

雲開層觀切高寒三面江湖一面山眼界不知多少遠
望中幽鳥暮飛還

書子萊丙戌登科題名小錄後

屈指宣和歲在辰於今四十有三春吾家又得萊追繼
叢桂從茲不乏人

寄二兒

老懶誰能教子孫
靜中猶喜讀書聲
有如雙鳳傳家學
令我聞風畏後生

次韻趙積中慈湖即事

江南七月旱不雨
捲地風霾翳寰宇
夷門先生有底忙
車馬東遊亦良苦

干戈九載予心哀
亂離誰復歌南陔
喜君父母老相守
調官仍遂金陵來

入室兒童隘函丈想見綠衣還謔浪掛冠如欲賦田園
一水淮鄉足閒曠

嗟予留滯行當歸秋雨夜寒聞搗衣短檠明滅淚眼暗
誰令不寐心如飛

山色湖光過雨清江邊歸騎淨無塵先生有酒快吾取
相逢少見如斯人

平生可慣償詩債追驥疲驚況加怠不妨對客自揮毫
文社於今有淮海

欽定四庫全書

相山集卷十五

宋 王之道 撰

七言絕句

冬日出郊二首

覆塊青青麥欲齊
田家籬落柘岡西
歲饑冬暖聊相補
扶藹歸來餉菜妻

一鞭乘興上山頭
雨脚隨風濕破裘
冬日有情還可愛
忽開雲霧見林丘

七夕苦旱望雨

田禾吐白將就槁
野草垂黃幾欲燃
來日天孫嫁河鼓
洗車今喜有黃緣

游毛公洞六首

說詩人去想雲車
千古青巖倚碧虛
訓詁未容端拜議
一言聊復問關雎

旋披荊棘入山來
洞口晴煙翳不開
試問真人竟何處
他年相就謁蓬萊

須信桃源路易迷野人遙指過山西
由來石室非仙窟
漫向雲中覓舊蹊

山前踴躍見樵人欲問神仙更問津
指點長柯向東去
不知銀穴又非真

徘徊銀穴送斜暉散遣長鬚上翠微
青鳥似知予意確
故傳仙語傍人飛

偶因青鳥遂幽尋翠壁蒼崖白日陰
三扣石扉人不識
滿山松竹自悲吟

題太湖驛竹軒

粉節儲霜競出籬
我來猶及筍生時
清風一榻君休問
明月半窗予自知

過水南題范諫議書室

函丈當年貯卧龍
笑談曾記一尊同
幅巾已起草廬在
寂寞溪山空晚風

題德章山

叢玕潑黛千峰色
急雨奔霆萬壑聲
莫訝祖師來入夢

祇應知我欲山行

過含山郵亭和子厚弟壁間韻三首

犯暑籃輿趁曉耕
東風迎面葛衣輕
過山繚繞湖邊路
楊柳陰中帶月行

透雲斜日影朦朧
樹杪依微少女風
景物重來正無恙
為君收拾向詩中

開窗如見碧油幢
新竹春來過屋長
漸近柴桑舊家路
清風來報稻花香

吳興舟中有作

一水濡湏百里間，舉頭遙見水西山。
微波不動又終日，安得扁舟送我還。

春日偶成

短垣新雨上銀泥，柳外幽花咫尺迷。
獨喜流鶯解人意，一聲聲傍綠牕啼。

春日書事呈歷陽縣蘇仁仲八首

籃輿兀醉出東門，賴有官舟為解紛。
流馬木牛今已矣，

其餘兒輩說三分

芳草池塘處處佳
竹籬茅屋野人家
清明過了桃花盡
頗覺春容屬菜花

似是東風惱客心
淹留行色故相禁
扁舟正在江南岸
又擾浮雲作暮陰

情似長江流不斷
事如芳草剗還生
此身何苦浮名絆
正擬花時取次行

公餘槐柳轉斜日
吏散烏雀來空庭
康成書帶可人意

坐見茸茸相對青

學似鄉家宜有法人如我輩豈無情新詩早自推心服
幽會知誰付目成

猛風吹雨暮江頭煙草微茫一片愁雙鯉不來無處問
欲尋歸路轉悠悠

子美不應花解惱次公何必酒而狂知君頗負風流債
安得司空慣竊香

過段寨二首

隨行知有筆如椽不礙冥搜借榻眠酒醉詩成還上馬
秋蛇春蚓任人傳

嫩綠天紅照眼明物華春事暗相驚提壺不飲勸誰飲
正在竹叢深處鳴

經過合寨弔孟氏故居二首

藤梢棘刺失朱門空想當年載酒樽天色重增行客恨
東風吹雨濕黃昏

行過春泥沒馬深幾聲幽鳥轉喬林感時恨別愁無那

賴有清樽慰此心

晚憩聞雷

湖外山光入座來
水晶宮闕翠屏開
纖纖細落催花雨
隱隱輕鳴啟蟄雷

含山驛中

日暖風輕晝睡餘
海棠嬌褪玉肌膚
楊花也似知人意
來趁飛紅入座隅

鳴山驛夜雨

夜來風雨曉還晴沙路無泥快早行鳥語花容春自好
有生何處不安生

夜聞風雨

狂風橫雨忽來鳴半夜長亭客夢驚想見海門春漲急
犇軍百萬聽潮聲

丘城道中

翠巘中間白水邊野梅官柳似當年正看遶樹下殘日
便覺前村生晚煙

出合肥北門二首

淮水東來沒蹀無只今南北斷修塗東風却與人心別
布暖吹生徧八區

斷垣甃石新修疊折戟埋沙舊戰場閑閨凋零煨燼裏
春風生草沒牛羊

烏江道中聞杜鵑有感

麻葉蓬蓬小麥肥楊花風裏杜鵑啼故園尚阻歸來賦
慚愧東坡雨一犁

竹城道中

一溪清水浸餘霞
風裏歸鴻字脚斜
今夜不知何處宿
路迴山崦兩三家

下閣道中

小橋流水數家村
春入川原日自暎
馬上不知嵐氣重
誤驚征袖濕啼痕

西門道中聞人售田

走利奔權幾日休
歸來還復郭南游
直饒心計姦如鬼

終恐輸他善自謀

題大泉寺

六峯環翠繞金藍
下馬初嘗一酌甘
久旱喜看雲氣決
晚風吹雨過江南

題南巢地藏寺

蚊蒲生花夜更長
睡鄉蝴蝶正悠颺
山僧不恤秋眠熟
連打鐘聲到枕旁

題大龍寺

萬松邀我上崔嵬入寺山屏次第開無說欲知真說法
松聲還送出山來

題宿松蘿山寺

小驛隳頽不見容著鞭東走梵王宮怪禽落日休相恐
五里松篁一徑通

題許市接待院壁

一簷冬日送清溫疎竹蕭蕭覆短垣來就老僧同曝背
不妨危坐默無言

題許市施水坊

夢斷蓬窻特地愁，卧聞溪水啣舡頭。
夜航又逐東風去，重歎因人此滯留。

宿大泉遇雨

予每遠適，行日不雨，歸日雨，必作故常苦之。是役也，以幹性肥，上時秋旱，連數月嘉穀盡矣，而二麥未得入土，民心憂覺。何翅倒懸，當曉發，月城晚抵大泉山，方弛擔，與主僧語，而山中出雲，頃更四合。

入夜遂雨予聞之喜不自知蓋非為一已設也紹興二十四年秋九月壬子

我行常苦雨相隨旱甚民心若倒垂坐久雲容膚寸合願同焦槁被甘滋

題苦竹寺海棠洞三首

翠袖朱脣一笑開依風無力競相隈陽城豈是僧家物端恐齊奴步障來

隔夜西風為辦嚴掃除氛曠出晴天正逢翠幄張青綺

應念朱脣拂紫綰

一徑封苔知雨足
貳車行縣昔時遷
對花啜茗思春日
拂拭新詩益悵然

題崇因院清軒

予政和八年秋九月自冶父還軒車託宿是刹時
積雨初霽夜月飛霜溪光炯然如水晶環繞殿閣
令人毛髮森豎神思清發乃得一絕書之壁後三
十七年復經此覓前所題既就堙滅因主僧乞詩

復為書之

肥松瘦竹古招提
軒檻重遊識舊題
清意不曾吟得盡
夜來明月浸寒溪

法雲寺和湯立賢留題

寺占湖邊數畝山
杖藜偷得一朝閒
昨朝恰別居巢長
又喜新詩在壁間

題大善寺

絮帽曳絲雲帶雨
瓊梳環髻水圍山
江村五月黃梅過

十里人煙渺莽間

題華嚴院澤上人西韻軒用前韻

疎簾如霧隱窻紗
虹影青紅雨脚斜
坐久清風起何處
一盃昌歎映葵花

和彥立兄贈信上人

鼎社年來得志閒
一杯聊復效逃禪
新詩莫漫驚流俗
恐被旁人喚皎然

贈浮屠道本二首

道本自歷陽廣教與六僧偕來以天申節受具足
戒於當塗之萬壽寺戒壇能誦吾兄彥時所題二
詩故其歸也用韻以贈之

暑雨初晴江上村藕花無數午風溫梁山正帖淮南岸
到得精藍日未昏

一去禪關忽五春異鄉驚見眼終清問師參學今何解
雲在青天水在蘋

和因上人四首

拍天湖水亂蛙鳴
雨腳隨風潑細塵
翠幄不開楊柳晚
紅雲初坐海棠春

菱葑彌天眼界幽
澆愁應辦酒如油
坐憐漁父機心勝
萬頃春苗不下鷗

水雲深處見人煙
桑柘鳴鳩似可憐
却怪銀泥環四壁
由來春雨上蝸涎

荼蘼花底照衰顏
風送餘香到酒間
春色他年尚無恙
紅裙來繼謝東山

和天衣聰老五首

師去無為十五年重來猿鶴亦忻然此生不負今朝祝
冀結龍華會裏緣

老懷歸去幾何年吳越宗風久寂然聞說近來獅子吼
應將驢脚問生緣

法華靈應著當年今古何曾有間然不見後身房次律
却因和璞記前緣

達磨東來不記年一燈然處百燈然願從清淨求明了

應喜晨齋學省緣

綠楊芳草自年年人老逢春重喟然
六入儻能除舊習
三乘端許結新緣

再用韻贈湖塘來上人二首

望外荆榛蔽輞川我來何必為逃喧
亂餘村疇雞豚盡
秋到江湖藻荇繁

湖水瀾瀾浸綠苔湖邊衰柳兩三栽
游魚得意潛還躍
幽鳥多情去復來

山西莊舍贈信上人和彥時兄四首

十里西疇路半硯短轅無力困瘡痛支筇預作淵明具
甕有烏程不用沽

四壁蕭然犬自馴年來食粥甑生塵相逢未暇寒溫語
請效參寥作故人

一枝清瘦早梅春風味高如郭泰巾襟袖歸來香未歇
要將佳句屬詩人

寒鴉成陣下遙村冰合回塘鏡一番瀼瀼溪流響何處

亂山無數不知源

贈道人

道人知我過山來
旋掃蓬門對水開
惟有溫松薦樽俎
一畦疎綠隱蒿萊

和道可

卧雨春頭到地長
清風一榻借微涼
碁聲驚斷高僧夢
起撥爐中未過香

和彥逢弟簡相山古上人二首

相山風物似斜川
岑寂那知市井喧
歲旱但傷禾穗槁
秋饑猶喜粟皺繁

蒿艾深迷古徑苔
荒涼菊塢與松栽
稻田正似人無幾
賴有高僧伴我來

送浮屠善慧

雲濤霜嶽正崢嶸
夢裏清游覺尚驚
師到西湖如得句
不妨頻寄老書生

送心上人

西城畦稼卧黃雲似說千門許見分
驢載馬馱應不厭
一簷牙齒正湏君

春日訪道上人

隴麥如煙水滿塘路邊桃李問柔桑
道人不作淵明調
笑碾新茶看瑞香

贈桐林老僧

繞屋青桐碧玉椽坐來巖石起雲煙
過門竟日奔馳者
應羨山僧去道邊

贈林山善相老榮師

至哉擇術妙難論
邂逅何妨丐一言
我已無心求富貴
餘生歸命給孤園

回峯寺和浮屠坦然韻

晝睡醒來日過中
山光入座水涵空
綠楊堤外荷花富
招致清香賴有風

和彥時兄贈覺上人化燈

江上相逢試問津
杖藜來作化燈人
欲知照破無明窟

佛殿熒熒一點明

和僧廣實三首

曾向高安見大愚迢迢一路徹天衢而今到處無此事
困睡饑餐得自如

聞說年來貧更甚生涯和地與錐無通身是手承誰力
方信常人實若虛

動容俱見古人情千里歸來得我驚七載何曾有離別
水中明月本相親

題德章山親公塔

憑陵風雨上崔嵬一見親公病眼開似是前生師弟子
兩年今日入山來

過廣德宿開元寺上人房

滿城花草鬪欣榮嫩綠夭紅照眼明會有禪房通野色
解鞍聊復憇予行

書來上人房

十里清風水拍天老僧齋罷抱頭眠丹楹畫棟看摧壓

好為僧伽作勝緣

書源上人壁

丹楓黃樹壯秋容
詰曲僧房一徑通
塔似道人飛白筆
開窓還見倚晴空

題德山涓老無句堂

峯頭示衆合如何
一棒由來已自多
空去空回還信否
至今疑殺那人訶

送浮屠宗立東遊二首

立上人禪林祀梓法窟棟梁數千里徃見天衣十
五年坐參庭柏爾來半口吸乾溟渤一拳打破虛
空真得和錐也無豈不成大丈夫哉是行來自湖
湘訪予相山將復觀潮浙東予聞而快之故作是
詩以贈

撫掌相逢一笑同自言參學百無功蜜甜忘却十年苦
雷吼嚇成三日聾

西走漫償行脚債南游聊勘坐禪翁不知色力能強健

又復觀潮過浙東

贈蔡道人

賢蓋山前蔡道人十年學佛頗安貧似聞親見天衣老
為改今名作惠新

贈羽流韓洞章

韓生畫馬有家法胷中驂騑不可計酒酣試作姜子牙
恍若當年釣清渭